

摘藻堂四庫全書薈要

集部

欽定四庫全書薈要

集部
御選宋詩卷四十六



詳校官原任主事
臣 李斯咏

欽定四庫全書薈要卷一萬八千三百五十三

集部

御選宋詩卷四十六

七言律詩二

范仲淹

得李四宗易書

秋風海上憶神交
江外書來慰寂寥
松柏舊心當化石
塤篪新韻似聞韶
須期管鮑垂千古
不學張陳負一朝
三復荊州無限意
王孫芳草意遙遙

歐伯起相訪

海涯牢落若為懷
惟子相過未忍迴
勁草不隨風偃去
孤桐何意鳳飛來
樽藏金醴遲遲進
匣鎖雲和特特開
萬古功成有天命
浩然攜手上春臺

試筆

偶緣疎拙得天真
豈問前途屈與伸
車馬縱能欺倦客
江山猶可助騷人
嬾如叔夜書盈几
狂似淵明酒滿巾
況有南窗姬易在
此心那更起纖塵

送石曼卿

河光岳色過秦關
英氣飄飄酒滿顏
賈誼書成動西漢
謝安人笑起東山
亨途去覺雲天近
舊隱回思水石閒
此道聖朝如不墜
疏封宜在立談間

桐廬郡齋書事

千峰秀處白雲驕
吏隱堂邊豈待招
數仞堂高誰富貴
一枝巢隱自逍遙
杯中好物閑宜進
林下幽人靜可邀
莫道官清無歲計
滿山芝朮長靈苗

依韻酬太傅張相公見贈

出處曾無致主功
南陽為守地猶雄
醉醒往日慚漁父
得失今朝賀塞翁
七里河邊歸帶月
百花洲上嘯生風
臥龍鄉曲多賢達
願預逍遙九老中

依韻答王源叔憶百花洲見寄

芳洲名冠古南都
最惜塵埃一點無
樓閣春深來海燕
池塘人靜下仙鳬
花情柳意憑誰問
月彩波光豈易圖
溪上山公發新詠
許昌何必詫西湖

富弼

題安樂窩

先生自衛客西畿樂道安閒絕世機再命經筵終不起
獨甘窮巷寂無依貫穿百代常窮古吟詠千篇亦造微
珍重相知忽相訪醉和風雨夜深歸

文彥博

秋風吟

獵徧蘭叢與桂枝巢居未必有先期靈臺十仞烏隨轉

阿閣三重鳳豈知度柳暗催蟬嘒嘒出雲高送雁離離
漢宮玉樹知何限爭忍重吟畫扇詩

寓懷

高樓閒背夕陽登渺渺長懷不自勝錦瑟有時聞北渚
鈿車何日到西陵地寒萱草猶難種天遠瑤華豈易憑
多謝蘇門清嘯客了無塵事染壺冰

和公儀遊太華

山水清音步步隨謝家歌舞豈須攜深遊霧市身應潤

直上蓮峰路不迷
細草舒英承蠟屐
長松傾蓋護雲梯
巖隈靈藥皆堪采
采得盈箱亦自提

遊史館張大卿靖致政李少卿章史館傳兵部

堯俞濟上郊園

時判河陽
初雪濟源廟作

疇昔常聞處士莊
林泉勝景甲山陽
一渠寒水流清濟
千仞濃嵐聳太行
枋口雲歸穿古木
燕川風過入修篁
前賢舊業何人繼
分與三賢作醉鄉

余於洛城建昌門內循城得池數百畝其池乃

唐之藥園因學徐勉作東田引水一支灌其中
歲月漸久景物已老喬木修竹森然四合菱蓮
蒲芰于沼于汊結茅構宇務實去華野意山情
頗以自適故作是詩

引得清伊一派通三灣相接勢無窮便成渺渺江湖趣
更有蕭蕭蘆葦風西洛故年為勝地東田今日屬哀翁
藥園事跡分明在盡在雲卿舊記中

唐沈佺期雲卿藥園記東田乃其舊

地

奉陪伯溫中散伯康朝議君實大夫席於所居
小園作同甲會

四人三百十二歲況是同生丙午年招得梁園同賦客
合成商嶺采芝仙清談疊疊風盈席素髮飄飄雪滿肩
此會從來誠未有洛中應作畫圖傳

田況

四月十九日汎浣花溪

浣花溪上春風後節物正宜行樂時十里綺羅青蓋密

萬家歌吹綠楊垂
畫船疊鼓臨芳甸
綵閣凌波汎羽卮
霞景漸曛歸棹促
滿城歡醉待旌旗

王琪

金陵賞心亭

千里秦淮在玉壺
江山清麗壯吳都
昔人已化遼天鶴
舊畫難尋臥雪圖
冉冉流年去京國
蕭蕭華髮老江湖
殘蟬不會登臨意
又噪西風入座隅

余靖

謝蕭閣副惠茉莉花栽

素豔南方獨出羣，只應瓊樹是前身。
自緣香極宜晨露，勿謂開遲怨晚春。
闌檻故將賓榻近，丹青重整畫圖新。
移根得地無華裔，從此飛觴不厭頻。

和胡學士館中庭樹

仙材封殖九重深，苒苒何年別故林。
晚色半籠青瑣闥，春光長在玉山岑。
靜臨高閣翻清吹，坐見羈禽息密陰。
休羨井梧能待鳳，凌霜堅守歲寒心。

和董職方見示初到番禺詩

五方殊俗古難并千載猶存古越城

今子城及東有故壘俗號趙陀城

客聽潮雞迷早夜

三更潮上即雞鳴

人瞻颶母識陰晴

颶風欲至黑雲

起謂之颶母

波濤洶湧天邊闊犀象爛煊徼外生太守不才

當永寄惟憂南畝廢農耕

趙抃

初入峽

峽江初過三遊洞天氣新調二月風樵戶人家隨處見

仙源雲路有誰通
峰巒壓岸東西碧
桃李臨波上下紅
險磧惡灘各幾許
晚停征棹問漁翁

同萬州相里殿丞遊溪西山寺

使君呼客入山行
曉徑前驅照彩旌
蠻女背樵巖側避
野僧攜刺馬頭迎
千層雲水迷三峽
一闕人煙認百城
樓閣凭餘清我聽
竹風蕭瑟澗泉鳴

題杭州清風閣

庭有松蘿砌有苔
退公聊此遠塵埃
潮音隱隱海門至

泉勢潺潺石縫來夜榻衾裯仙夢覺曉窗燈火佛書開
休官不久輕舟去喜過嚴陵舊釣臺

鈴兵王閣使素芳亭賞梅花

素萼清香並酒卮主人勤意囑留詩為逢蜀國新開日
却憶江南舊賞時春早未通桃李信臘殘都放雪霜姿

先公舊植亭欄外肯構重來見本枝

先司空鈴兵日始創是亭閣使繼其

職可謂有子矣

下牢津

拖舟百丈苦攀躋一過牢津恍自迷
花放亂紅迎綵旆
谷傳深響答鳴鼙
避人幽鳥凌雲噪
抱子驚猿走險啼
春岫重重春水綠
却疑身在武陵溪

次韻范師道御史

昔如李郭去登仙
今復東行並客船
夾岸雲山千里路
滿襟風月九秋天
持杯旋斫桐江鱸
覓句頻賡蜀國牋
君到七閩佳麗地
荔枝紅發欲殷然

招運判霍交回轅

自邛之雅漸高丘所過從容盡勝遊白鶴山頭雲裏寺
金雞關外雨中州公今南按蠲民瘼歲已西成輟上憂
江瀆荷花開似錦且同歸去采蓮舟

張方平

送吳春卿赴都

法座臨軒策俊髦同君陞見預旌招疲駕十駕始千里
孤鶴一飛先九霄蘭棹秋風行邈迤觚稜旭日勢岌嶢
石渠為謝諸儒彥行邁同趨便殿朝

蝶

遲景融融暖氣浮
中園曲密小庭幽
春風故引顛狂甚
芳樹相容爛漫遊
不慣風流輸楚女
嬾將身世問莊周
有時潛見多情處
每遇王孫盡日留

青陽峽

奇峰疊嶽無重數
橫澗飛泉會一溪
老樹藤蘿從古長
寒空雲靄與天迷
幽中應有神仙住
深處惟聞猿鳥啼
野性舊多山水癖
恨無心賞此相攜

唐介

寄杭州孫資政

何人富貴不圖安大抵為臣節欲完手執樞機謀國易
心存忠義入時難臨風未覺龍媒老衝斗誰知劒氣寒
天子聖神思舊德肯教旌馭久盤桓

胡宿

津亭

津亭歌闕戒棠舟五兩風來不暫留西北浮雲連魏闕

東南初日滿秦樓層城渺渺人傷別芳草萋萋客倦遊
平樂舊歡收不得更憑飛夢到瀛洲

寄昭潭王中立

高絃一弄武陵深六幕天空萬里心吳苑歌驪成遠別
楚峰回雁好歸音十千美酒花期隔三百枯碁奕思沉
莫上孤城頻送目浮雲西北是家林

沖虛觀

五粒青松護翠苔石門岑寂斷纖埃水浮花片知仙路

風遞鸞聲認嘯臺
桐井曉寒千乳斂
茗園春嫩一旗開
馳煙未勒山亭字
可是英靈許再來

淮南發運趙邢州被詔歸闕

天臺封詔紫泥馨
馬首前瞻北斗城
人在函關先望氣
帝於京兆最知名
一區東第趨宸近
數刻西廂接畫榮
正是兩宮裁化日
百金雙壁拜虞卿

石介

留題敏夫隱居

三迴到此尋逋客
杯案蕭疎滋味長
山飯半甌椽子熟
春蔬一筍朮苗香
四時泉石應無夏
滿谷雲霞別是鄉
終待共君結鄰里
竹邊相並兩閒房

村居

幽居一畝枕溪稜
堦下松杉纏古藤
常愛園林深似隱
不嫌門戶冷如僧
菱宜過社猶催種
山近經秋却嬾登
已把壯心閒頓置
少年莫要苦相憎

張先

題花下無相院西溪

積水涵虛上下清
幾家門戶岸痕平
浮萍破處見山影
小艇歸時聞草聲
入郭僧尋塵裏去
過橋人似鑑中行
已憑軟語添秋色
莫放修蘆礙目生

吳江

春後銀魚霜下鱸
遠人曾到合思吳
欲圖江色不上筆
靜覓鳥聲深在蘆
落日未昏聞市散
青天都淨見山孤
墻南水漲虹垂影
清夜燈光照太湖

梅摯

自和寒食韻

龜堞春遊土著奢，青青踏去冒煙華。
翠停舴艋客尋寺，紅卸羃離人上車。
亭落五重沽卓酒，釵行十二步潘花。
乘歡盡醉高陽侶，倒載歸來不認家。

歐陽修

和應之同年秋日雨中登廣愛寺閣寄梅聖俞
經年都洛與君交，共寄詩中思最豪。
舊社更誰能擁篲，

新秋有客獨登高徑蘭欲謝悲零露籬菊空開泛凍醪
縱使河陽花滿縣亦應留滯感潘毛

初出真州汎大江作

孤舟日日去無窮行色蒼茫杳靄中山浦轉帆迷向背
夜江看斗辨西東漉田漸下雲間雁霜日初丹水上楓
蓴菜鱸魚方有味遠來猶喜及秋風

松門

島嶼松門數里長懸崖對起碧峰雙可憐勝境當窮塞

翻使流人戀此邦
亂石驚灘喧醉枕
淺沙明月入船窗
因遊始覺南來遠
行盡荆江見蜀江

冬至後三日陪丁元珍遊東山寺

幕府文書日已稀
清樽歲宴喜相攜
寒山帶郭穿松路
瘦馬尋春踏雪泥
翠蘚蒼崖森古木
綠蘿盤石暗深谿
為貪賞物來猶早
迎臘梅花吐未齊

至喜堂新開北軒
植楠木兩株走筆呈元珍表

臣

為鄰碧砌宜佳樹自劬蒼苔選綠叢不向芳菲趁開落
直須霜雪見青蔥披條泣轉清晨露響葉蕭騷半夜風
時掃濃陰北窗下一枰閒且伴衰翁

戲答元珍

春風疑不到天涯二月山城未見花殘雪壓枝猶有橘
凍雷驚筍欲抽芽夜聞歸雁生鄉思病入新年感物華
曾是洛陽花下客野芳雖晚不須嗟

再至西都

伊川不到十年間，魚鳥今應怪我還。
浪得浮名銷壯節，羞將白髮見青山。
野花向客開如笑，芳草留人意自閒。
却到謝公題壁處，向風清淚獨潺潺。

送沈待制陝西都運

幾歲瘡痍近息兵，經營方喜得時英。
從來漢粟勞飛輓，當使秦人自戰耕。
道左旌旗諸將列，馬前弓劍六蕃迎。
知君材力多閒暇，剩聽陽關醉後聲。

懷嵩樓新開南軒與郡僚小飲

繞郭雲煙匝萬重昔人於此感懷嵩霜林落後山爭出
野菊開時酒正濃解帶西風飄畫角倚欄斜日照青松
會須剩酒攜嘉客踏雪來看羣玉峰

初至潁州西湖種瑞蓮黃楊寄淮南轉運呂度
支發運許主客

平湖十頃碧琉璃四面清陰乍合時柳絮已將春去遠
海棠應恨我來遲啼禽似與遊人語明月閒撐野艇隨
每到最佳堪樂處却思君共把芳卮

去思堂手植雙柳今已成陰因而有感

曲欄高柳拂層簷却憶初栽映碧潭人昔共遊今孰在
樹猶如此我何堪壯心無復身從老世事都銷酒半酣
後日更來知有幾攀條莫惜駐征驂

內直對月寄子華舍人持國廷評

禁署沉沉玉漏傳月華雲表溢金盤纖埃不隔光初滿
萬物無聲夜向闌蓮燭燒殘愁夢斷薰爐熏歇覺衣單
水精宮鎖黃金闕故比人間分外寒

和梅公儀嘗茶

溪山擊鼓助雷驚
逗曉靈芽發翠莖
摘處兩旗香可愛
貢來雙鳳品尤精
寒侵病骨惟思睡
花落春愁未解醒
喜共紫甌吟且酌
羨君瀟灑有餘清

和較藝書事

相隨懷詔下天闈
一鎖南宮隔幾旬
玉麈清談消永日
金罇美酒惜餘春
杯盤錫粥春風冷
池館榆錢夜雨新
猶是人間好時節
歸休過我莫辭頻

早朝感事

疎星牢落曉光微，殘月蒼龍闕角西。
玉勒爭門隨仗入，牙牌當殿報班齊。
羽儀雖接鴛兼鷺，野性終存鹿與麕。
笑殺汝陰常處士，十年騎馬聽朝雞。

三日赴宴口占

賜飲初逢禊節佳，昆池新漲碧無涯。
九門寒食多遊騎，三月春陰正養花。
共喜流觴修故事，自憐雙鬢惜年華。
鳳城殘照歸鞍晚，禁籞無風柳自斜。

遊石子澗

富相公
創亭

截薛高亭古澗隈，偶攜佳客共徘徊。
席間風起聞天籟，雨過山光入酒杯。
泉落斷崖春壑響，花藏深崦過春開。
麝麇禽鳥莫驚顧，太守不將車騎來。

水磨亭子

多病山齋厭鬱蒸，經時久不到東城。
新荷出水雙飛鷺，喬木成陰百轉鶯。
載酒未妨佳客醉，憑高仍見老農耕。
使君自有林泉趣，不用絲簧亂水聲。

樓頭

百尺樓頭萬疊山
楚江南望隔晴煙
雲藏白道天垂幕
簾捲黃昏月上弦
桑落蒲城催熟酒
柳衰章陌感彫年
髮光如葆寧禁恨
不待為郎已颯然

送趙山人歸舊山

屈賈江山思不休
霜飛翠葆忽驚秋
吟拋楚畹蘭苔老
歸有淮山桂樹留
聒耳春池蛙兩部
北封秋塢橘千頭
嗔條怒穎真堪媿
莫染衣塵更遠遊

即目

李徑陰森接翠疇，押簾風日澹清秋。
晚烏藏柳棲殘照，遠燕傷風失故樓。
星漢經年雖可望，雲波千疊不緘愁。
平居革帶頻移孔，誰問無聊沈隱侯。

昨日偶陪後騎同，適近郊謹成七言四韻兼呈
聖俞

堤柳纔黃已落梅，尋芳弭蓋共徘徊。
桑城日暖蠶催浴，麥隴風和雉應媒。
別浦人嬉遺翠羽，弋林春廢鎖歌臺。

歸鞍暮逼官街鼓府吏應驚便面回

贈王介甫

翰林風月三千首吏部文章二百年老去自憐心尚在
後來誰與子爭先朱門歌舞爭新態綠綺塵埃試拂絃
常恨聞名不相識相逢樽酒盍流連

初夏西湖

積雨新晴漲碧溪偶尋行處獨依依綠陰黃鳥春歸後
紅蘼青苔人跡稀萍匝汀洲魚自躍日長欄檻燕交飛

林僧不用相迎送
吾欲臺頭坐釣磯

蘇舜欽

留題樊川李長官莊

杜曲東邊風物幽
我來繫馬獨淹留
門前翠影山無數
竹下寒聲水亂流
酒壓新陳常得醉
花開番次不知秋
主公堆案縈官事
早晚歸來今白頭

天章道中

畫鷁低飛湖水平
高低樓閣滿稽城
人遊鏡裏山相照

魚戲空中日共明
盡是荷風香不斷
忽逢溪雨氣尤清
籃輦却上蘭亭步
猿鳥雲蘿伴此行

望太湖

杳杳波濤閱古今
四無邊際莫知深
潤通曉月為清露
氣入霜天作暝陰
笠澤鱸肥人膾玉
洞庭柑熟客分金
風煙觸目相招引
聊為停橈一楚吟

阻風野寺有感呈子履

輕舟留滯已春殘
攜手棲棲田野間
盡日東風吹百草

有時雙鷺下前灣古來少見如君困世上應無似我閒
抖擻塵襟莫回首謗書終不到溪山

秋宿虎丘寺數夕執中以詩見貺因次原韻

生事飄然付一舟吳山蕭寺且淹留白雲已有終身約
醪酒聊驅萬古愁峽東蒼淵深貯月巖排紅樹巧粧秋
徘徊欲出向城市引領煙蘿還自羞

遊雪上何山

今古何山是勝遊亂峰縈轉繞滄洲雲含老樹明還滅

石礙飛泉咽復流
遍嶺煙霞迷俗客
一溪風雨送歸舟
自嗟塵土先衰老
底事孤僧亦白頭

夜聞笳酒有聲因而成詠

糟牀新壓響泠泠
敲枕初聞睡自輕
幾段愁悰俱滴破
一番歡意已篇成
空階夜雨徒傳句
三峽流泉無此聲
只待松軒看飛雪
呼賓同飲甕頭清

梅堯臣

依韻和歐陽永叔同遊近郊

洛水橋邊春已回，柳條葱蒨眼初開。
無人拾翠過幽渚，有客尋芳上古臺。
林邃珍禽時一轉，酒酣紅日未西頽。
知君最是憐風物，更約偷閒取次來。

依韻和永叔同遊上林院後亭見櫻桃花
悉已披謝

去年君到見春遲，今日尋芳是夙期。
祇道朱櫻纔弄蕊，及來幽澗已殘枝。
飄英尚有遊蜂戀，著子惟應谷鳥知。
把酒聊能慰餘景，乘歡不厭夕陽時。

送樂職方知泗州

長堤凍柳不堪折窮臘使君單騎行
蘇合輕裘霜莫犯銅牙大弩吏先迎
山旁楚賈連檣汨水上禹書寒磬清
試向郡樓東北望煙波千里月臨城

次韻和長文禡祀郊外見寄并呈韓子華

鶉鴝知雨在桑中雄逐雌飛自不同
胡粉未生輕蝶白燕脂先綻野櫻紅
高高樹裏鞦韆月獵獵牆頭蓓蕾風
曉下祠壇多寄咏衣冠方侍大明宮

宮槐

漢家宮殿蔭長槐
嫩色蔥蔥不染埃
天仗龍旂穿影去
鈎陳豹尾拂枝來
青蟲掛後蜂銜子
素月生時桂並栽
我意方同杜工部
冷淘惟喜葉新開

次韻景彝三月十六日范景仁家同飲還省宿
種桃依竹似仙家
邀對春風共泛霞
席上未觀雙舞鳳
城頭已覺聚啼鴉
匆匆跨馬人歸省
幕幕生煙樹斂花
稚子候門知我醉
東方明月照扉斜

送李載之殿丞赴海州權務

瓜蔓水生風雨多
吳船發棹唱吳歌
槎從秋漢下應快
人憶故園歸奈何
世事靜思同轉轂
物華催老劇飛梭
茶官別有清閒味
海月團圓入酒螺

上元從主人登尚書省東樓

閭闔前臨萬歲山
燭龍銜火夜珠還
高樓迴出星辰裏
曲蓋遙瞻紫翠間
轆轤車聲碾明月
參差蓮豔競紅顏
誰教言語如鸚鵡
便著金籠密鎖關

自和

沉水香焚金博山杜陵誰復與車還馬尋綺陌知何曲
人在珠簾第幾間法部樂聲長滿耳上樽醇味易酡顏
更貧更賤皆能樂十二重門不上關

又和

康莊咫尺有千山欲問紫姑應已還人似嫦娥來陌上
燈如明月在雲間車頭小女雙垂髻簾裏新粧一破顏
却下玉梯雞已唱謾言齊客解偷關

和吳長文舍人對雪懷永叔內翰

紫禁低雲拂綺櫳西垣人憶玉堂翁
撫髭覓句方傳咏著樹成花尚舞空
不管因風吹塞外任教飛片落杯中
曉來城郭遮無路阮籍驅車莫歎窮

和宋次道答弟中道寄懷

陸家兄弟苦西東黃耳傳書近已通
共歎流年同轉轂各驚華髮似飛蓬
河冰夜合知霜勁塞霧朝開見日紅
臘盡春來又相遠江南江北望歸鴻

葉清臣

先照寺

一徑涼飈響萬松青霞紫霧秘靈蹤寒生列洞前溪雨
聲到諸天午夜鐘仙頂月高猶駕鶴陰潭雲起舊降龍
出塵境界無多遠已上金庭第七重

蔡襄

上元進詩

并序

伏覩元夕法駕特御端門宣諭臣僚曰上元觀燈

不為遊賞蓋與民共樂也臣職在文字恭惟德音
宣布睿旨感詩人揄揚盛美之私輒成短章上千
宸覽

疊聳青峰寶炬森端門初晚翠華臨宸遊不為三元夜
樂事全歸萬衆心天上清光開夜色人間和氣閣春陰
要知盡作華封祝四十年來惠愛深

漳南十詠

錄二首

滿月池亭

有客高懷脫世塵
碧灣晴檻樂遊頻
無心自合波中月
照影誰分鑑內人
莎砌亂蛙爭噪雨
杏梁雙燕欲留春
長年老厭趨毫末
來揖孤雲作上賓

西湖

湖上山光一筍青
佛宮高下裹巖扃
煙收水曲開塵匣
春送人家入畫屏
竹氣更清初霽雨
梅英猶細欲殘星
吳船越棹知何處
柳拂長堤月滿汀

宿延平津

鳴籟蕭森萬木聲濃嵐環合亂峰青樓臺矗處雙溪會
雷電交時一劒靈曉市人煙披霽旭夜潭漁火鬪寒星
畫屏曾指孤舟看今日孤舟在畫屏

耕園驛

并序

明道中予為漳州軍事判官晚秋嘗至州西耕園
驛驛庭有佛桑樹十株開花繁盛念其寒月窮山
方自媚好乃作耕園驛佛桑花詩一首既而乘桴
東下又作溪行一首慶歷七年予使本路明年夏

四月自汀來漳復至是驛花尚仍故追感昔遊因
紀前事并載舊篇龕於西壁

使軺迢遞到天涯候館遷延感歲華白髮却攀臨砌樹
青條猶放過墻花悲來惟見金城柳醉後曾乘海客槎
欲問昔遊無處所晚煙生水日沉沙

杭州訪吉祥璘上人追感蘇才翁同賞牡丹

曾乘春飲遶花畦花底餘香入燕泥剪處佳人傳燭下
歸時明月到雲西重來草樹驚秋色零落交朋感舊題

若使他年逢勝賞一觴知復共誰攜

和偶登安濟亭

津亭遙望草萋萋空曠清懷與物齊
春水倒行潮欲上晚雲平壓日先低
高人覽古今何在遠渡傷離客自迷
好共山翁同出處不隨朝騎五門西

十五日遊龍華淨明兩院值雨

垂楊修竹半藏山一徑紆回暮雨間
綠滿野田看渺渺白飛巖溜自潺潺
空村鮐背行歌去古寺頭陀乞食還

却羨幽人在深僻斷無來客叩禪關

遊煙霞洞

新晴特地入煙霞道並南山轉更賒幽磬過鄰溪口寺
衆鷄鳴午野人家洞深墮溜先如雨石古籠藤亂放花
潘岳小園猶作賦輕軒選勝樂無涯

庚子上元即事

老去年華只自驚又逢佳節向山城春臨半夜寒猶重
月到中天色更清上客風流連宿醉遊人歌調得新聲

遙思鳳闕行時令紅繖朱闌萬燭明

龔宗元

送陳友之四明

短亭祖帳接平川柳拂迴波繫畫船
漸向落暉分繡袖忍聽離曲怨鷗絃
雲連稽嶺應懷古路近花源好訪仙
那更憑高望天際江堤煙重草綿綿

劉敞

招友上清宮

修竹高松無俗塵全然不似近城闌黃冠習靜多藏客
野鳥忘機却傍人高閣倚雲銜落日廣庭霏雨濕清珉
北牕固有逍遙地來讀離騷戴角巾

臨波亭

綠楊菲草舊無蹊竹塢花源敵剡溪水影時翻高檻動
天形畧抱却城低逢迎野興鷗雙下點綴春愁鶯亂啼
宿雨楚山雲正滿高樓莫上使人迷

獨宿直舍

談笑從容宮漏稀
高軒去後掩重扉
風含玉宇霜威勁
月墮牕疏燭影微
周衛相望喧夕警
爐香不斷護朝衣
塵軀更覺仙山峻
旅夢端從江海歸

集禧齋

雨餘風露似新秋
燈燭惜惜十二樓
高枕江湖時獨往
卷簾河漢正西流
人間浪逐顛冥客
物外初知汗漫遊
拂露却趨青閣路
蓬萊回顧五雲浮

是日事畢
仍赴早朝

和御製後苑賞花釣魚



四照繁英拂檻開九重芝蓋賞春來卿雲共和光華旦
瑞露偏凝沆瀣杯池藻躍魚波淡蕩林光傾日景徘徊
淮陽閉閣頭今白夢遶釣天惜未陪

張徵

自然亭

久雨妨漁復滯樵自然亭上一逍遙萬緣不自閒中起
百事惟於睡裏消老去自知如蠟蠹病來誰悟似芭蕉
愛名之世忘名客幸有山林舊市朝

黃庶

和題雲臺觀

太華疑連畢昴回欲觀形勝上雲臺雪中地把銀屏立
雨後天將畫軸開景好更宜和月看客忙常是愛山來
我知遊者登臨意常恨西軒落日催

蘇洵

香

擣麝篩檀入範模潤分薇露合雞蘇一絲吐出青煙細

半炷燒成玉筍粗道士每占經次第佳人惟驗繡工夫
軒牕几席隨宜用不待高擎鵲尾爐

曾鞏

錢塘上元夜祥符寺陪咨臣郎中文燕席

月明如晝露華濃錦帳名郎笑語同金地夜寒消美酒
玉人春困倚東風紅雲燈火浮滄海碧水樓臺浸遠空
白髮蹉跎歡意少強顏猶入少年叢

和史館相公上元觀燈

九重仙仗豫遊歸，寶燭星繁換夕暉。
傳醅未斜清禁月，散花還拂侍臣衣。
天香暗度金虬暖，宮扇雙開彩鳳飛。
法曲世人聽未足，却迎朱輦下端闈。

環波亭

水心還有拂雲堆，日日應須把酒杯。
楊柳巧含煙景合，芙蓉爭帶露華開。
城頭山色相圍出，簷底波聲四面來。
誰信瀛洲未歸去，兩州俱得小蓬萊。

早起赴行香

枕前聽盡小梅花起見中庭月未斜微破宿雲猶度雁
欲深柳色已藏鴉井轡聲急催寒玉籠燭光繁秉絳紗
行到市橋人語密馬頭依約對朝霞

南軒竹

密竹娟娟數十莖早天瀟灑有高情風吹已送煩心醒
雨洗還供晚眼清新筍仍穿苔石上碎陰微破粉牆生
應須萬物冰霜後來看琅玕色轉明

甘露寺多景樓

欲收佳景此樓中
徙倚闌干四望通
雲亂水光浮紫翠
天吞山氣入青紅
一川鐘唄淮南月
萬里帆檣海外風
老去衣衿塵土在
祇將心目羨冥鴻

金山寺

塵外峒堯驚嶺宮
架虛排險出青紅
林光巧轉滄波上
海色遙涵白日東
夜靜神龍聽咒食
秋深蒼鷺起搏風
連荆控蜀長江水
盡在回廊顧盼中

李觀

蓬屋

長簷數尺庇堂東
疎漏從來只有蓬
日影碎如秋樹下
雨聲初似夜船中
竹經蠹後多垂地
筍到乾時半捲空
此處想非人所競
江湖終是屬漁翁

野意亭

福唐城郭掌中窺
旭日登臨到落暉
誰在畫簾沽酒處
幾多鳴櫓趁潮歸
晴時海色依稀辨
醉後鄉愁積漸微
山鳥不知紅粉樂
纔聞歌板便驚飛

題袁州東湖樂游堂呈龍學

古郡城池已枕江，重湖更在郡東方。
水仙座下魚鱗赤，龍女門前橘樹香。
路絕塵埃非灑埽，地無風雨亦清涼。
使君待客多娛樂，只有醒時覺異鄉。

陶弼

閣卓

萬仞天然閣卓形，陰陽不似衆山青。
一區海上神仙宅，數曲人間水墨屏。
華表鶴歸春谷響，玉京龍起夜潭腥。

可憐張葛無人繼三級高壇拂杳冥

周惇頤

觀已嶽木蓮

仙姿元是華巔栽不向東林沼上開
嫩蕊曉隨梅雨放清香時傍竹風來
枝懸縞帶垂金彈瓣落蒼苔墜玉杯
若使耶溪少年見定拋蘭槳到巖隈

邵雍

小圃逢春

隨分亭欄亦弄妍不妨時傍酒鑪邊
夜檐靜透花間月
晝戶晴生竹外煙
事到悟來皆偶爾
天教閒去豈徒然
壺中日月長多少
爛占風光十二年

秋遊

七月芙蓉正爛開
東南園近日徘徊
有時風向池心過
無限香從水面來
罨畫溪深方誤入
洞庭湖晚未成迴
坐來一霎蕭蕭雨
又送新涼到酒杯

馮京

謝潭倅南宮遷

嘗思鵬海翮飛翻曾得天風送羽翰恩比丘山何以戴
心同金石欲移難經年空歎音書絕千里常思道義歡
每向江陵訪遺治邑人猶指縣題看

司馬光

和宋次道大慶殿上元迎駕

鳳律年華到尚新九重氣象已成春曉雲低拂羽林仗
宿雨先清紫陌塵玉殿鳴梢傳警蹕彤庭委珮集簪紳

闕前無復魚龍戲自有驩謠億萬人

寒食御筵口號二首

雨意沉沉潑火餘
夔龍盛集退朝初
酒殽絡繹來丹禁
冠劍參差下玉除
紫鳳歸飛雲爛漫
黃鸝新轉柳扶疎
麥禾滿野邊烽息
佳節何妨賦樂胥

聖主褒優鼎軸臣
金觴玉醴照青春
萬家煙火朝來靜
九陌風光雨後新
高燕翻飛驚紫綬
餘花點綴託朱輪
問牛因得觀民俗
不獨嬉遊惜令辰

次韻和韓子華寒食休沐與諸公同會趙令園
暮歸馬上偶成

冠蓋連翩陌上來風光爛漫擁樓臺玉卮貯酒隨宜飲
綺席尋花觸處開小雨前宵先潑火季春明日又吹灰
須知勝集人間少惆悵金羈容易迴

范鎮

遊學射山

幾年魂夢寄西州春晚歸逢學射遊十里香風塵不動

半山晴日雨初收，指麾赤隊呈飛騎。
次第紅粧數勝籌，夾道綺羅瞻望處。
管絃旌旆擁遨頭。

王珪

依韻恭和聖製上元觀燈

雪銷華月滿仙臺，萬燭當樓寶扇開。
雙鳳雲中扶輦下，六鰲海上駕山來。
鎬宮春酒霑周宴，汾水秋風陋漢才。
一曲昇平人盡樂，君王又進紫霞杯。

次韻和元厚之平羌

卷四十一
詔收新土鳳林東四百年來一戰功蔥嶺自橫秦塞上
金城還落漢圖中輕裘坐款無遺策折箭來庭有舊風
零雨未濛音已捷不勞歸旅詠周公

王安石

段約之園亭

愛公池館得忘機初日流連至落暉菱暖紫鱗跳復沒
柳陰黃鳥轉還飛徑無凡草惟生竹盤有嘉蔬不采薇
勝事閬州雖或有終非吾土豈如歸

送項判官

斷蘆洲渚落楓橋渡口沙長過午潮山鳥自呼泥滑滑
行人相對馬蕭蕭十年長自青衿識千里來非白璧招
握手祝君能強飯華簪常得從雞翹

登寶公塔

倦童疲馬放松門自把長筇倚石根江月轉空為白晝
嶺雲分暝與黃昏鼠搖岑寂聲隨起鴟矯荒寒影對翻
當此不知誰客主道人忘我我忘言

示俞秀老

繚繞山如涌翠波
人家一半在煙蘿
時豐笑語春聲早
地僻追尋野興多
窄堵朱甍開北向
招提素脊隱西阿
暮春要與君攜手
處處相煩作好歌

讀眉山集次韻雪詩

錄一首

若木昏昏未有鴉
凍雷深閉阿香車
搏雲忽散篴為屑
剪水如分綴作花
擁帚尚憐南北巷
持杯能喜兩三家
戲掇弄掬輸兒女
羔袖龍鍾手獨叉

和御製賞花釣魚二首

蔭幄晴雲拂曉開
傳呼仙仗九天來
披香殿上留朱輦
太液池邊送玉杯
宿蕊暖含風浩蕩
戲鱗清映日徘徊
宸章獨與春爭麗
恩許賡歌豈易陪

謁謁祥雲輦路晴
傳呼萬歲禱春聲
蔽虧玉仗宮花密
映燭金溝御水清
珠蕊受風天上暖
錦鱗吹浪日邊明
從容樂飲真榮遇
願賦嘉魚頌太平

御溝

渺渺金河漲欲平數支分綠報清明常縈輦路漂花去
更引流杯送酒行靜見金輿穿樹影清含玉漏過牆聲
哀顏一照自多感回首江南春水生

次韻祖擇之登紫微閣

漠漠秋陰護掖垣青雲祇在兩楹間宮樓唱罷雞人退
門闕朝歸虎士閒華蓋北瞻天帝座蓬萊東想道家山
却慙久此隨諸彥文采初無豹一斑

和王微之秋浦望齊山感李太白杜牧之

齊山置酒菊花開
秋浦聞猿江上哀
此地流傳空筆墨
昔人埋沒已蒿萊
平生志業無高論
末世篇章有逸才
尚得使君驅五馬
與尋陳迹久徘徊

不到太初兄所居遂已十年以詩攀寄

一水衣中剪翠綃
九峰環珮刻青瑤
生才故有山川氣
卜築兼無市井囂
三葉素風門閥在
十年陳迹履綦消
歸榮早晚重攜手
莫負幽人久見招

和晚菊

不得黃花九日吹空看野葉翠歲蕤淵明酩酊知何處
子美蕭條向此時委翳似甘終草莽栽培空欲傍藩籬
可憐蜂蝶飄零後始有閒人把一枝

酬淨因長老樓上翫月見懷有疑君魂夢在清
都之句

道人心與世無求隱几蕭然在此樓坐對高梧傾曉月
看翻清露洗新秋登臨更欲邀元亮披寫還能擬惠休
顧我不知天上樂虛疑昨夜夢仙遊

再至京口寄漕使曹郎中

漂流曾落此江邊
憶與詩翁賦浩然
鄉國去身猶萬里
驛亭分首已三年
北城紅出高枝靚
南浦青回老樹圓
還似昔時風露好
只疑談笑在君前

次韻平甫金山會宿寄親友

天末海門橫北固
煙中沙岸似西興
已無船舫猶聞笛
遠有樓臺祇見燈
山月入松金破碎
江風吹水雪奔騰
飄然欲作乘桴計
一到扶桑恨未能

登西樓

樓影侵雲百尺斜
行人樓上憶天涯
情多自悔登臨數
目極因驚悵望賒
一曲平蕪連古樹
半分殘日帶明霞
潘郎何用悲秋色
祇此傷春髮已華

春寒

春風滿地月如霜
拂曉鐘聲到景陽
花底袂衣朝宿衛
柳邊新火夜嚴妝
冰殘玉斝泉初動
水澀銅壺漏更長
從此暄妍知幾日
便應鶗鴂損年芳

法喜寺

門前白道自縈迴
門下青莎間綠苔
雜樹繞花鶯引去
壞簷無幕燕歸來
寂寥誰共樽前酒
牢落空留案上杯
我憶故鄉誠不淺
可憐鶗鴂重相催

長干寺

梵館清閒側布金
小塘回曲翠文深
柳條不動千絲直
荷葉相依萬蓋陰
漠漠岑雲相上下
翩翩沙鳥自浮沉
羈人樂此忘歸去
忍向西風學越吟

泛舟青溪入水門登高齋奉呈康叔

簿領紛紛惜此時起攜佳客散沉迷十圍但見諸營柳
九曲難尋故國溪牽埭欲隨流水遠放船終礙畫橋低
子猷清興何曾盡想憶高齋更一躋

送沈康知常州

作客蘭陵迹已陳為傳謠俗記州民溝塍半費田疇薄
廚傳相仍市井貧常恐勞人輕白屋忽逢佳士得朱輪
殷勤話此還惆悵最憶荆溪兩岸春

九日登東山寄昌叔

城上啼鳥破寂寥
思君何處坐岵嶢
應須綠酒醺黃菊
何必紅裙弄紫簫
落木雲連秋水渡
亂山煙入夕陽橋
淵明久負東籬醉
猶分低心事折腰

到舒次韻答平甫

夜別江船曉解驂
秋城氣象亦潭潭
山從樹外青爭出
水向沙邊綠半涵
行問嗇夫多不記
坐論公瑾少能談
只愁地僻無賓客
舊學從誰得指南

王安國

金明池

霓旌遠遠拂樓船
滿地春風錦繡筵
三島路深浮閬苑
九霞觴滿奏鈞天
仗歸金闕浮雲外
人望池臺落日邊
最引平生江海趣
波瀾一段草如煙

和魏道輔雨中見示

移病憚憚久雨中
鳴騶時聽六街東
忽吟佳客詩消暑
遠勝前人檄愈風
海運我殊慙斥鷃
陸沉君合伴翔鴻

更酬珠玉思談笑裹飯何須厭屢空

春陰

似雨非晴意思深宿醒牽率卧春陰
苦憐燕子寒相並生怕梨花晚不禁
薄薄簾幃欺欲透遙遙歌管壓來沉
北園南陌狂無數祇有芳菲會此心

池上春日

一池春水綠於苔水上花枝間竹開
芳草有時依舊長文禽無事等閒來
年顏近老空多感風雅含情媿不才

獨有前人修禊在荒亭終日此徘徊

假寐

計較平生分閉關偶然容得近人窠春風池沼魚兒戲
暮雨樓臺燕子閒假寐塵侵黃卷上行吟花墜綠苔間
了無一事撩方寸自是頽齡合鬢斑

繚垣

繚垣烏鵲近人飛簾外瞳瞳日上遲檜作寒聲風過後
梅含春意雪殘時古今無物為真樂出處何心更詭隨

寄語年華聊一笑未應長負醉鄉期

王安禮

恭和御製上元觀燈

鑾輿清曉出瑤臺羽衛瞻迎扇影開鳳闕張燈天上坐
雞林獻曲海邊來修文可笑秦無策能賦休誇楚有材
星漢未斜鈞樂闋君王宣示萬年杯

御選宋詩卷四十六

謹案第十六頁後八行不用絲簧亂水聲刊本簧
訛篴據廬陵集改



總校官庶吉士臣侍
校對官檢討臣蕭九成
騰錄舉人臣李駟

總校官庶吉士臣侍
校對官檢討臣蕭九成
騰錄舉人臣李駟

欽定四庫全書薈要

集部

御選宋詩卷四十七



詳校官原任主事

臣李斯咏

欽定四庫全書薈要卷一萬八千三百五十四

集部

御選宋詩卷四十七

七言律詩三

韓維

春霽憶洛陽

少年結客洛陽時
閒傍東風駐馬蹄
山色遠饒潘岳宅
波光輕撼窈娘堤
花繁到處紅如堵
酒好尋常醉似泥
賴有金臺知己在
應憐魂斷虎牢西

寶奎殿前花樹子去年與宋中道同賦今復答

宋詩

長條飛動不依欄
淡粉濃朱巧作團
無語不辭終日立
有情曾是隔年看
春羅試舞衣新換
古錦藏詩墨未乾
我為愁多悲節物
欲酬佳句淚霑翰

樂道示長句

光陰不覺成陳迹
事變何嘗有定期
身外閒愁無自入
飲中歡興未全衰
編排暑後新投酒
點檢秋來合唱詞

更欲邀君浮畫舫藕花菱蔓滿西池

景仁招況之聞用歌舞望門而反作詩戲之

一夜嚴風結素波盍簪寧避曉寒多
范滂攬轡方清俗墨子回車豈惡歌
雲外雁寒驚歲晚林間鴉語弄春和
知君不久承寬詔始奈紅裙綠酒何

奉和喬年館宿

蓬萊仙構斗魁旁遮直初登漢署郎
雲向城頭收暝色月從樓角放寒光
行看砌菊嗟殘艷坐對書芸襲暗香

景物過清渾不寐素經讐罷得新章

時喬年
校醫書

寄題蘇子美滄浪亭

聞君買宅洞庭傍白水千畦插稻秧生事已能支伏臘
歲華全得屬文章騫飛鸞鳳知何暮蟠螯蛟龍未可量
莫以江山足清尚便收才業傲虞唐

寒食出郊

都門氣象雨餘佳壓盡風塵見草芽日薄風和近郊路
朱紅粉白遠林花堤間獨去嬾姍女柳下相逢輕輶車

絲髻未催樽酒在不須辛苦問年華

城西

繡鞅金羈十里塵共傳恩詔樂芳辰
千重翠木開珍園百尺朱樓壓寶津
御柳初長遮雉宮花未識駭遊人
自憐窮僻看山眼來對天池禁籞春

和詹叔遊廬山見寄

香爐峰色壓羣山仰眺頻敬使者冠
江面煙波搖紫翠佛宮金碧照清寒
密藏幽谷梅千樹散走鳴泉竹萬竿

今日頓驚塵慮盡一章佳句雪中看

襄柑分餽景仁以詩將之

荊州解綬十經春迴夢青林遶漢濱
霜氣輕寒催紺實渚波餘潤作甘津
僧園採掇寧論數客路奔馳竟占新
雪意垂收高會缺分金聊助席間珍

謝堯夫寄新酒

故人一別兩重陽每欲從之道路長
有客忽傳龍坂至

開樽如對馬軍嘗

常怪杜詩曰洗盞開嘗對馬軍及得
錦屏山題名有寄河南府使馬軍送

新酒者然
後躍然

定將瓊液都為色疑有金英密借香却笑當

年彭澤令籬邊終日歎空觴

范純仁

和王弱翁白沙道中

共驅羸馬躡寒蕪景色鮮明近洛都出谷流泉春更綠
隔林幽鳥暮相呼伊川舊賞疑朝夢少室重看勝畫圖
從此便窮山水樂相從應不厭崎嶇

和獻可丙午二月六日別臺中僚友

感時情緒已難禁，況復懷賢恨愈深。
鴉噪晚林催遠客，雲藏夕照弄輕陰。
松筠自信凌霜操，葵藿長傾向日心。
同志飄零山館寂，欲沽芳酒與誰斟。

和韓侍中春陰馬上

三月芳菲欲暮天，可堪零雨晝連綿。
潤催隴麥將黃節，寒阻春蠶趁早眠。
疎柳拂牆難結絮，嫩苔鋪砌已成錢。
牡丹只待晴陽照，看吐新花一尺圓。

次韻韓侍中遊興慶池

兩奉清歡到碧塘再遊無奈惜春光
莎勻古岸添新綠蝶遶殘枝採舊香
佳木引陰交翡翠疎林迸筍補篔簹
從容賞遍西園景化國偏知日月長

和元子發學士見寄

二紀區區困宦遊相逢莫訝鬢先秋
清時無補身空老往事難追涕旋流
舉世交情憐我少經旬行色為君留
何時歸去江湖上風月同尋范蠡舟

和閻灝重陽見贈二首

秋懷多感怯清笳判向西風醉帽斜塞上星霜人易老
幕中談笑客偏嘉金英浮酒稠於蟻丹葉粧林遠似花
身健幾逢佳節在登臨尤更惜年華

登高宜不負良期須信時光似隙暉碧穗引爐香滿座
黃金遶席菊成圍物華旋逐鳴飈減客思空隨去鴈飛
莫訝尊前偏醉倒醉鄉纔到便忘歸

和子華陪文潞公宴東田

湍流澹澹走平田清曠園林未暑天遶圃曲堤多種竹

泛舟雙沼不栽蓮沙邊白鷺翹來靜叢上幽花晚更妍
乘月陪歡忘夜久莎間潛有露珠圓

龍門秋日上潞公

龍門秋色勝春時新霽登臨景更奇三邑峰巒侵碧漢
兩涯樓殿照清伊鳴泉亂瀉香山道翠柏深藏白傅祠
獨恨不能陪杖屨思公空作寄公詩

呂誨

答邵康節

冥冥鴻羽在雲天邈阻風音已十年不謂聖朝求治理
尚容遺逸臥林泉羨君自有隨時樂顧我官閒飽晝眠
應笑無成三黜後病衰方始賦歸田

祖無擇

張寺丞鳴玉亭書事

為憐瀟灑近城闌來往何曾問主人列宿曉昏雲郁郁
流泉秋淨石粼粼陸機詩就反招隱班固文成正答賓
愁見西峰日將暮却驅羸馬入埃塵

寺有四絕一曰靈巖予以赴官獲此稅鞅因賦
拙句用誌其行

常想靈蹤得到難因迴征轡此盤桓松風逗磬僧齋冷

石水環堂客夢寒聖作自同堯典布

寺有偃蓋松白鶴泉及藏太宗皇帝

御製御書

古碑猶是魏朝刊最憐山色當樓好欲去重來一

凭闌

鄭俠

同子忠上西樓

偶因送客上西樓共愛佳城枕海陬
雁翅人家千巷陌犬牙商舶數汀洲
風吹細雨兼秋淨雲漏疎星帶水流
獨有單親頭早白迢迢東望不勝愁

幽居

蕭條深巷寄門墻城郭村居事異常
石展地衣三藥徑錦圍天柱十花檣
幽禽隔樹鉤輶語異草搖風和合香
不覺冬歸與春到但知無事日偏長

吳中復

遊海雲寺倡和詩

錦里風光勝別州，海雲寺枕碧江頭。
連郊瑞麥青黃色，遶路鳴泉深淺流。
彩石池邊成故事，茂林坡上憶前遊。
綠樽好共衰翁醉，十日殘春不少留。

陳舜俞

和開祖丹陽別子瞻後寄

仙舟繫柳野橋東，會合情多勞謫翁。
相對一尊浮蟻酒，輕寒二月小桃風。
羈懷散誕謳歌裏，世事縱橫醉笑中。

莫恨明朝又離索人生何處不匆匆

元絳

送君貺宣徽太尉歸洛

萬釘環帶照龜綢冠蓋郊西送使華
去國正逢梁苑雪探春先得洛城花
樓臺紫府神君館松石平泉太尉家
四紀交遊驚晚暮白頭分袂一咨嗟

馮山

中巖封崇寺

萬竹林間一徑升滿巖金碧靜香燈飛泉散亂垂千尺
危閣欹斜擁數層雨氣或從簷際落風光時向坐中凝
荒碑文字那能讀合眼前煎茶問老僧

和李獻甫雲頂

舉首看山不到山每來留恨翠微間禪關但有經年約
使傳終無一日閒春到栢林香渺渺雨餘巖漏瀉潺潺
虎溪莫過虛邀客猿鶴鍾峰悵未還

沈括

秀州官舍秋日

草滿池塘霜送梅，林疎野色近樓臺。
天圍故越侵雲近，潮上孤城帶月回。
客夢冷隨楓葉斷，秋心低逐雁聲來。
流年又喜經重九，可意黃花是處開。

沈邁

依韻和韓子華遊趙氏園亭

春色先從禁苑來，侯家次第競池臺。
清明已近鞦韆動，上巳相尋曲水開。
繡幕風微花自舞，金爐日永麝銷灰。

病夫歡意那能強漫作山公倒載回

次韻和仲卿中秋不見月

木葉飄飄客正悲浮雲更起蔽朱曦分無好月臨清夜
且共芳樽樂盛時密戶那憂風蕩燭重簾寧怯露侵肌
金壺漏盡玉山倒天外晴陰誰復知

沈遼

次韻酬李泰叔

歲寒倚遍甬東樓喜上江邊一葉舟流轉生涯常壁立

飄蕭官况信雲浮欲逢故舊開青眼先得詩章說白頭
縱有一樽聊可飲正當相對論窮愁

南漪堂

湖上逍遙避百愁年來頻向此中休
簷前山勢翠相照牀下水紋清不流
縈帶夕陽移畫舸留連明月卧前洲
高僧會取遲留意應有人來悵昔遊

王令

憶潤州葛使君

六朝遊觀委蒿蓬想像當時事已空
半夜樓臺橫海日萬家簫鼓過江風
金山寺近塵埃絕鐵甕城高氣象雄
欲放船隨明月去應留閒暇待詩翁

秋日寄滿子權

樓前暮靄暗平林樓上人愁意思深
未必薄雲能作雨從來秋日自多陰
三年客夢迷歸路一夜西風老壯心
欲作新聲寄遺恨直絃先斷淚盈琴

江上

暮暮荒城沒遠煙暮雲歸旆忽相連春江流水出天外
晚渡歸舟下石邊杏萼春深翻淺纈柳花風遠弄晴綿
無錢買得江頭樹輸與漁人繫釣船

和人孤雁

朔磧雲深憶舊行心驚漢月忽騫翔江南水闊無天地
漠北沙寒有雪霜遠目送飛沉暮靄西風吹影過斜陽
衡南未到歸何日須信張羅近稻梁

方維深

和周楚望紅梅用韻

清香皓質世稱奇
試作輕紅更自宜
紫府與丹來換骨
春風吹酒上凝脂
直教臘雪無藏處
只恐朝雲有去時
溪上野桃何足種
秦人應獨未知

程顥

秋日偶成

閒來無事不從容
睡覺東窗日已紅
萬物靜觀皆自得
四時佳興與人同
道通天地有形外
思入風雲變態中

富貴不淫貧賤樂男兒到此是英雄

郊行即事

芳原綠野恣行時
春入遙山碧四圍
興逐亂紅穿柳巷
困臨流水坐苔磯
莫辭盞酒十分醉
祇恐風花一片飛
況是清明好天氣
不妨遊行暮忘歸

春日江上

新蒲嫩柳滿汀洲
春日漁舟一棹浮
雲幕倒遮天外日
風帘輕颺竹間樓
望窮遠岫微茫見
興逐歸槎汗漫遊

不畏蛟螭起白浪却憐清泚向東流

文同

後溪晚步

陰陰芳樹暗回堤路入蒙籠轉野溪澤雉應媒高復下
林鴉引子歇還啼青蒲宛宛全淹水紫筍班班半出泥
倚杖風前感時節亂煙斜日一蟬嘶

早晴至報恩山寺

山石巉巖磴道微拂松穿竹露沾衣煙開遠水雙鷗落

日照高林一雉飛
大麥未收治圃晚
小蠶猶卧斫桑稀
暮煙已合牛羊下
信馬林間步月歸

題晉源舒太博清溪閣

危閣飛空羽翼開
下蟠波面影徘徊
光搖畫板月深淺
聲遶曲欄風往來
暝色四郊煙莽蒼
曉雲千嶂雪崔嵬
主人好事民無訟
日夕登遊對酒杯

成都楊氏江亭

汀洲煙雨卷輕扉
遙望軒窗隱翠圍
萬嶺西來供曉色

一江南下載清暉
鳬鷗半入闌干宿
魚蟹常隨舴艋歸
我亦舊多滄海思
幾時如此得苔磯

洗竹和吳龍圖韻

斤斧從來到此稀
為撩疏密遶藩籬
已繁不用饒新筍
縱礙何妨惜舊枝
風外清音聞曲閣
月中寒影下方池
想公日在琅玕逕
正是棠陰訟少時

山城秋日野望感事書懷詩五章呈吳龍圖

錄一

首

早是蓬山預校讐起居常赴殿東頭
鵷鷺擁陛聯簪笏日月開天拜冕旒
一出光陰銷遠郡兩行篇什詠清秋
有人更在揚莊上文似相如肯見休

北齋雨後

小庭幽圃絕清佳愛此常教放吏衙
雨後雙禽來占竹秋深一蝶下尋花
喚人埽壁開吳畫留客臨軒試越茶
野興漸多公事少宛如當日在山家

徐積

春草

日暖郊前雪盡時
東風吹起綠初齊
人來花下禽偷避
客到山前路已迷
洛邑少年金作彈
杜陵驕馬玉為蹄
歌樓酒市無尋處
踏遍青青日已西

寄路倅洪澤阻水

莫教容易過龜山
多少人心願復還
更有南城黃綬客
但吟西戶綠楊間
纔經濁汴無澄浪
且趁清淮洗醉顏
安得就公歌一曲
緩吟遲步夕陽灣

寄呂帥

師屯十萬建牙旗大纛森森重使威
燕頷將軍宜繡帽
龍驤戰士愛犀衣銀鏑作隊行
春去蠟炬成林校獵歸
更看鈴齋憑几處文如布陣翰如飛

蘇軾

七月二十四日以久不雨出禱磻溪宿號二十
五日自號渡渭宿於僧舍曾閣閣故曾氏所建
也夜久不寐見壁有前縣令趙薦留名有懷其

人

龕燈明滅欲三更
欹枕無人夢自驚
深谷留風終夜響
亂山銜月半牀明
故人漸遠無消息
古寺空來看姓名
欲向磻溪問姜叟
僕夫屢報斗杓傾

寄題興州鼉太守新開古東池

百畝新池傍郭斜
居人行樂路人誇
自言官長如靈運
能使江山似永嘉
縱飲坐中遺白帟
幽尋盡處見桃花
不堪山鳥號歸去
長遣王孫苦憶家

十二月十四日夜微雪明日早往南溪小酌至

晚

南溪得雪真無價走馬來看及未消
獨自披榛尋履跡最先犯曉過朱橋
誰憐破屋眠無處坐覺村飢語不囂
惟有暮鴉知客意驚飛千片落寒條

次韻柳子玉過陳絕糧二首

錄一首

如我自觀猶可厭非君誰復肯相尋
圖書跌宕悲年老燈火青熒語夜深
早歲便懷齊物意微官敢有濟時心

南行千里成何事一聽秋濤萬鼓音

龜山

我生飄蕩去何求再過龜山歲五周
身行萬里半天下僧卧一菴初白頭
地隔中原勞北望潮連滄海欲東遊
元嘉舊事無人記故壘摧頽今在不

宋文帝遣將拒魏太武築城此山

宋叔達家聽琵琶

數絃已品龍香撥半面猶遮鳳尾槽
新曲翻從玉連鎖舊聲終愛鬱輪袍
夢回只記歸舟字賦罷雙垂紫錦條

何異烏孫送公主碧天無際雁行高

正月二十一日病後述古邀往城外尋春

屋上山禽苦喚人檻前冰泐忽生鱗
老來厭伴紅裙醉病起空驚白髮新
卧聽使君鳴鼓角試呼稚子整冠巾
曲欄幽榭終寒窘一看郊原浩蕩春

寒食未明至湖上太守未來兩縣令先在

城頭月落尚啼烏烏榜紅舷早滿湖
鼓吹未容迎五馬水雲先已颺雙鳬
映山黃帽螭頭舫夾道青煙鵲尾爐

老病逢春只思睡獨求僧榻寄須臾

立秋日禱雨宿靈隱寺同周徐二令

百重堆案掣身閒一葉秋聲對榻眠
牀下雪霜侵戶月枕中琴筑落堦泉
崎嶇世味嘗應遍寂寞山棲老漸便
惟有問農心尚在起占雲漢更茫然

登玲瓏山

何年僵立兩蒼龍瘦脊盤盤尚倚空
翠浪舞翻紅罷亞白雲穿破碧玲瓏
三休亭上工延月九折巖前巧貯風

脚力盡時山更好莫將有限趁無窮

宿九仙山

九仙謂左元放
許邁王謝之流

風流王謝古仙真一去空山五百春
玉室金堂餘漢士桃花流水失秦人
困眠一榻香凝帳夢遶千巖冷逼身
夜半老僧呼客起雲峰缺處湧冰輪

次韻述古過周長官夜飲

二更鐃鼓動諸鄰百首新詩間八珍
已遣亂蛙成兩部更邀明月作三人
雲煙湖寺家家境燈火沙河夜夜春

曷不勸公勤秉燭老來光景似奔輪

寶山新開徑

藤梢橘刺元無路竹杖梭鞋不用扶
風自遠來聞笑語水分流處見江湖
回觀佛骨青螺髻踏遍仙人碧玉壺
野客歸時山月上棠梨葉戰暝禽呼

杭州牡丹開時僕猶在常潤周令作詩見寄次
其韻

羞歸應為負花期已見成陰結子時
與物寡情憐我老

遣春無恨賴君詩
玉臺不見朝酣酒
金縷猶歌空折枝
從此年年定相見
欲師老圃問樊遲

和子由柳湖久涸忽有水
開元寺山茶舊無花
今歲盛開二首

錄一首

長明燈下石闌干
長共松杉鬪歲寒
葉厚有稜犀甲健
花深少態鶴頭丹
久陪方丈曼陀雨
羞對先生苜蓿盤
雪裏盛開知有意
明年開後更誰看

新城道中二首

東風知我欲山行
吹斷簷間積雨聲
嶺上晴雲披絮帽
樹頭初日挂銅鉦
野桃含笑竹籬短
溪柳自搖沙水清
西崦人家應最樂
煮葵燒筍餉春耕

身世悠悠我此行
溪邊委轡聽溪聲
散材畏見搜林斧
疲馬思聞卷旆鉦
細雨足時茶戶喜
亂山深處長官清
人間岐路知多少
試向桑田問耦耕

李鈴轄坐上分題戴花

二八佳人細馬馱
十千美酒渭城歌
簾前柳絮驚春晚

頭上花枝奈老何
露濕醉巾香掩冉
月明歸路影婆娑
綠珠吹笛何時見
欲把斜紅插阜羅

會客有美堂周郊長官與數僧同泛湖往北山
湖中聞堂上歌笑聲以詩見寄因和二首時周

有服

錄一首

藹藹君詩似嶺雲
從來不許醉紅裙
不知野屐穿山翠
惟見輕橈破浪紋
頗憶呼盧素彥道
難邀罵坐灌將軍
晚風落日原無主
不惜清涼與子分

病中遊祖塢院

紫李黃瓜村路香
烏紗白葛道衣涼
閉門野寺松陰轉
敲枕風軒客夢長
因病得閒殊不惡
安心是藥更無方
道人不惜堦前水
借與匏尊自在嘗

與述古自有美堂乘月夜歸

娟娟雲月稍侵軒
潋潋星河半隱山
魚鑰未收清夜永
鳳簫猶在翠微間
淒風瑟縮經絃柱
香霧淒迷著鬢鬟
共喜使君能鼓樂
萬人爭看火城還

初自徑山歸述古召飲介亭以病先起

西風初作十分涼
喜見新橙透甲香
遲暮賞心驚節物
登臨病眼怯秋光
慣眠處士雲菴裏
倦醉佳人錦瑟傍
猶有夢回清興在
卧聞歸路樂聲長

次韻周長官壽星院同餞魯少卿

琉璃百頃水仙家
風靜湖平響釣車
寂歷疎松敲晚照
伶俜寒蝶抱秋花
困眠不覺依蒲褐
歸路相將踏桂華
更著綸巾披鶴氅
他年應作畫圖誇

述古以詩見責屢不赴會復次前韻

我生孤僻本無鄰老病年來益自珍
肯對紅裙辭白酒但愁新進笑陳人
北山怨鶴休驚夜南畝巾車欲及春
多謝清詩屢推轂那解轉方輪

張子野年八十五尚聞買妾述古今作詩

錦里先生自笑狂莫欺九尺髯眉蒼
詩人老去鶯鶯在公子歸來燕燕忙
柱下相君猶有齒江南刺史已無腸
平生謬作安昌客畧遣彭宣到後堂

錢安道席上令歌者道服

烏府先生鐵作肝
霜風卷地不知寒
猶嫌白髮年前少
故點紅燈雪裏看
他日卜鄰先有約
待君投綬我休官
如今且作華陽服
醉唱儂家七返丹

惠山謁錢道人烹小龍團登絕頂望太湖

踏遍江南南岸山
逢山未免更留連
獨攜天上小團月
來試人間第二泉
石路縈回九龍脊
水光翻動五湖天
孫登無語空歸去
半嶺松聲萬壑傳

常潤道中有懷錢塘寄述古五首

錄三首

草長江南鶯亂飛年來事事與心違
花開後院還空落燕入華堂怪未歸
世上功名何日是尊前檢點幾人非
去年柳絮飛時節記得金籠放雪衣

浮玉山頭日日風湧金門外已春融
二年魚鳥渾相識三月鶯花付與公
賸看新翻睂倒暈未應泣別臉銷紅
何人織得相思字寄與江邊北向鴻

國豔天嬌酒半酣去年同賞寄僧簷
但知撲撲晴香軟

誰見森森曉態嚴
穀雨共驚無幾日
蜜蜂未許輒先甜
應須火急回征權
一片辭枝可得黏

刁景純賞瑞香花憶先朝侍宴次韻

上苑夭桃自作行
劉郎去後幾回芳
厭從年少追新賞
閒對宮花識舊香
欲贈佳人非泛洎
好紉幽佩弔沈湘
鶴林神女無消息
為問何年返帝鄉

同柳子玉遊鶴林招隱醉歸呈景純

花時臘酒照人光
歸路春風灑面涼
劉氏宅邊霜竹老

戴公山下野桃香
巖頭足練兼天淨
泉底真珠濺客忙
安得道人攜笛去
一聲吹裂翠崖岡

蘇州閭丘江君二家雨中飲酒二首

小圃陰陰徧灑塵
方塘潏潏欲生紋
已煩仙袂來行雨
莫遣歌聲便駐雲
肯對綺羅辭白酒
試將文字惱紅裙
今宵記取醒時節
點滴空堦獨自聞

五紀歸來鬢未霜
十眉環列坐生光
喚船渡口迎秋女
駐馬橋邊問泰孃
曾把四絃娛白傅
敢將百草鬪吳王

從今却笑風流守畫戟空凝燕寢香

與毛令方尉游西菩提寺二首

推擠不去已三年魚鳥依然笑我頑人未放歸江北路
天教看盡浙西山尚書清節衣冠後處士風流泉石間
一笑相逢那易得數詩狂語不須刪

路轉山腰足未移水清石瘦便能奇白雲自占東西嶺
明月誰分上下池黑黍黃粱初熟後朱柑紅橘半甜時
人生此樂須天賦莫遣兒郎取次知

平山堂次王居卿祠部韻

高會日陪山簡醉狂言屢發次公醒酒如人面天然白
山向吾曹分外青江上飛雲來北固檻前修竹憶南屏
六朝興廢餘丘壠空使姦雄笑寧馨

書普慈長老壁

志誠

普慈寺後千竿竹醉裏曾看碧玉椽倦客再遊行老矣
高僧一笑故依然久參白足知禪味苦厭黃公聒晝眠
惟有兩株紅百葉晚來猶得向人妍

雪後書北臺壁二首

黃昏猶作雨纖纖
夜靜無風勢轉嚴
但覺衾裯如潑水
不知庭院已堆鹽
五更曉色來書幌
半夜寒聲落畫簷
試埽北臺看馬耳
未隨埋沒有雙尖

城頭初日始翻鴉
陌上晴泥已沒車
凍合玉樓寒起粟
光搖銀海眩生花
遺蝗入地應千尺
宿麥連雲有幾家
老病自嗟詩力退
空吟冰柱憶劉叉

謝人見和前篇二首

已分酒杯欺淺懦，敢將詩力鬪深嚴。
漁蓑句好真堪畫，柳絮才高不道鹽。
敗履尚存東郭足，飛花又舞謫仙簷。
書生事業真堪笑，忍凍孤吟筆退尖。

九陌淒風戰齒牙，銀杯逐馬帶隨車。
也知不作堅牢玉，無奈能開頃刻花。
得酒強歡愁底事，閉門高卧定誰家。
臺前日暖君須愛，冰下寒魚漸可叉。

祭常山回小獵

青蓋前頭點皂旗，黃茆岡下出長圍。
圍弄風驕馬跑空立。

趁兔蒼鷹掠地飛回望白雲生翠巘歸來紅葉滿征衣
聖朝若用西涼簿白羽猶能效一揮

寄題刁景純藏春塢

白首歸來種萬松待看千尺舞霜風年拋造化陶甄外
春在先生杖屨中楊柳長齊低戶暗櫻桃爛熟滴堦紅
何時却與徐元直共訪襄陽龐德公

寄黎省州

膠西高處望西川應在孤雲落照邊瓦屋寒堆春後雪

峨眉翠埽雨餘天
治經方笑春秋學
好士今無六一賢
且待淵明賦歸去
共將詩酒趁流年

雪夜獨宿柏仙菴

晚雨纖纖變玉霙
小菴高卧有餘清
夢驚忽有穿窗片
夜靜惟聞瀉竹聲
稍壓冬溫聊得健
未濡秋旱若為耕
天公用意真難會
又作春風爛漫晴

韓太祝送遊太山

偶作郊原十日遊
未應回首厭籠囚
但教塵土驅馳足

終把雲山爛漫酬聞道逢春思濯錦便須到處覓菟裘
恨君不上東封頂夜看金輪出九幽

次韻答邦直子由四首

錄一首

君雖為我此遲留別後淒涼我已憂不見便同千里遠
退歸終作十年遊恨無揚子一區宅嬾卧元龍百尺樓
聞道鴈鴻滿臺閣網羅應不到沙鷗

九日次韻王鞏

我醉欲眠君罷休已教從事到青州鬢霜饒我三千丈

詩律輸君一百籌聞道郎君閉東閣且容老子上南樓
相逢不用忙歸去明日黃花蝶也愁

與秦太虛參寥會於松江而闕彥長徐安中適
至分韻得風字二首

吳越溪山興未窮又扶衰病過垂虹浮天自古東南水
送客今朝西北風絕境自忘千里遠勝遊難復五人同
舟師不會留連意擬看斜陽萬頃紅

二子緣詩老更窮人間無處吐長虹平生睡足連江雨

盡日舟橫擘岸風人笑年來三黜慣天教我輩一尊同
知君欲寫長相憶更送銀盤尾鬣紅

初到黃州

自笑平生為口忙老來事業轉荒唐長江遶郭知魚美
好竹連山覺筍香逐客不妨員外置詩人例作水曹郎
只慚無補絲毫事尚費官家壓酒囊

檢校官例折支
多得退酒袋

正月廿日往岐亭郡人潘古郭三人送余於女

王城東禪莊院

十日春寒不出門不知江柳已搖村
稍聞泱泱流冰谷盡放青青沒燒痕
數畝荒園留我住半瓶濁酒待君溫
去年今日關山路細雨梅花正斷魂

太守徐君猷通守孟亨之皆不飲酒以詩戲之
孟嘉嗜酒桓溫笑徐邈狂言孟德疑公獨未知其趣爾
臣今時復一中之風流自有高人識通介寧隨薄俗移
二子有靈應撫掌吾孫還有獨醒時

雪後到乾明寺遂宿

門外山光馬亦驚
階前屐齒我先行
風光誤入長春苑
雲月常臨不夜城
未許牛羊傷至潔
且看鴉鵲弄新晴
更須攜被留僧榻
待聽推簷瀉竹聲

正月二十日與潘郭二生出郊尋春忽記去年
是日同至女王城作詩乃和前韻

東風未肯入東門
走馬還尋去歲村
人似秋鴻來有信
事如春夢了無痕
江城白酒三杯釀
野老蒼顏一笑溫
已約年年為此會
故人不用賦招魂

答仲屯田次韻

秋來不見漢陂岑
千里詩盟忽重尋
大木百圍生遠籟
朱絃三歎有遺音
清風卷地收殘暑
素月流天掃積陰
欲遣何人賡絕唱
滿階桐葉候蟲吟

十月十五日觀月黃樓席上次韻

中秋天氣未應殊
不用紅紗照坐隅
山下白雲橫匹素
水中明月卧浮圖
未成短棹還三峽
已約輕舟泛五湖
為問登臨好風景
明年還憶使君無

贈惠山僧惠表

行遍天涯意未闌將心到處遣人安
山中老宿依然在案上楞嚴已不看
敲枕落花餘幾片閉門新竹自千竿
客來茶罷空無有盧橘楊梅尚帶酸

丁公默送蝓蚌

溪邊石蟹小如錢喜見輪囷赤玉盤
半殼含黃宜點酒兩螯斫雪勸加餐
蠻珍海錯聞名久怪雨腥風入坐寒
堪笑吳興饒太守一詩換得兩尖團

泛舟城南會者五人分韻賦詩得人皆苦炎字

四首

錄一首

城中樓閣似魚鱗不見清風起白蘋
試選苔谿最深處
仍呼我輩不羈人
窺船野鶴何曾下
見燭飛蟲空自馴
遶郭荷花一千頃
誰知六月下塘春

送牛尾狸與徐使君

風卷飛花自入帷
一樽遙想破愁睂
泥深厭聽雞頭鶻
蜀人謂泥滑
滑為雞頭鶻
酒淺欣嘗牛尾狸
通印子魚猶帶骨披綿

黃雀漫多脂殷勤送去煩纖手為我磨刀削玉肌

紅梅三首

怕愁貪睡獨開遲自恐冰容不入時故作小紅桃杏色
尚餘孤瘦雪霜姿寒心未肯隨春態酒暈無端上玉肌

詩老不知梅格在更看綠葉與青枝

石曼卿紅梅詩云
認桃無綠葉辨杏

有青
枝

雪裏開花却是遲何如獨占上春時也知造物含深意
故與施朱發妙姿細雨裛殘千顆淚輕寒瘦損一分肌

不應便雜夭桃杏數點微酸已著枝

幽人自恨探春遲不見檀心未吐時
丹鼎奪胎那是寶玉人頻頻更多姿
抱叢暗蕊初含子落殘濃香已透肌
乞與徐熙新畫樣竹間璀璨出斜枝

別黃州

病瘡老馬不任韉猶向君王得敝幃
桑下豈無三宿戀樽前聊與一身歸
長腰尚載撐腸米闊領先裁蓋瘻衣
投老江湖終不失來時莫遣故人非

再和曾子開從駕韻二首

眼花錯莫鬢霜勻病馬羸駒只自塵奉引拾遺叨侍從
思歸少傅羨朱陳衰年壯觀空驚目嶮韻清詩苦鬪新
最後數篇君莫厭擣殘椒桂有餘辛

憶觀滄海過東萊日照三山迤邐開桂觀飛樓凌霧起
仙幢寶蓋拂天來不聞宮漏催晨箭但覺簷陰轉古槐
供奉清班非老處會稽何日乞方回

時方闕
會稽守

六年正月二十日復出東門仍用前韻

亂山環合水侵門身在淮南盡處村五畝漸成終老計
九重新埽舊巢痕豈惟見慣沙鷗熟已覺來多釣石溫
長與東風約今日暗香先返玉梅魂

和王旂二首

異時常怪謫仙人舌有風雷筆有神聞道騎鯨遊汗漫
憶曾捫蝨話悲辛氣吞餘子無全目詩到諸郎尚絕倫
白髮故交空掩卷淚河東注問蒼旻

嫋嫋春風送度關娟娟霜月照生還遲留歲暮江淮上

來往君家伯仲間
未厭冰灘吼新洛
且看松雪媚南山
野梅官柳何時動
飛蓋長橋待子閒

和仲伯達

歸山歲月苦無多
尚有丹砂奈老何
繡谷只應花自染
鏡潭長與月相磨
君方傍海看初日
我已橫江擊素波
人不我知斯我貴
不須雷雨起龍梭

次韻許遵

蒜山渡口挽歸艍
朱雀橋邊看道裝
供帳已應煩百兩

擊鮮無久溷諸郎問禪時到長干寺載酒閒過綠野堂
此味只憂兒輩覺逢人休道北窗涼

次韻王定國得潁倅二首

錄一首

仙風入骨已凌雲秋水為文不受塵一噫固應號地籟
餘波猶足挂天紳買牛但自捐三尺射鼠何勞挽六鈞
莫向百花潭上去醉翁不見與誰親

次韻完夫再贈之什某已卜居毘陵與完夫有
廬里之約云

柳絮飛時筍箨斑風流二老對開關雪芽為我求陽羨
乳水君應餉惠山竹簟涼風眠晝永玉堂制草落人間
應容緩急煩閭里桑柘聊同十畝閒

次韻朱光庭初夏

朝罷人人識鄭崇直聲如在履聲中卧聞疎響梧桐雨
獨詠微涼殿閣風諫苑君方續承業醉鄉我欲訪無功
陶然一枕誰呼覺牛蟻初除病後聰

玉堂栽花周正孺有詩次韻

故山桃李半荒榛
粗報君恩便乞身
竹簟暑風招我老
玉堂花蕊為誰春
纖纖翠蔓詩催發
皎皎霜葩髮鬪新
只有來禽青李帖
他年留與學書人

次韻韓康公置酒見留

庭下黃花一醉同
重來雪嶽已穹窿
不應屢費譏安石
但使無多酌次公
鍾乳金釵人似玉
鷗絃鐵撥坐生風
少卿尚有車茵在
頗覺寬容勝弱翁

次韻劉貢父春日賜幡勝

寬詔隨春出內朝三軍喜氣挾狐貂鏤銀錯落翻斜月
剪綵繽紛舞慶霄臘雪強飛纔到地曉風偷轉不驚條
脫冠徑醉應歸卧便腹從人笑老韶

前一日微雪是
日幕次賜酒

送呂昌朝知嘉州

不羨三刀夢蜀都聊將八詠寄東吳卧看古佛凌雲閣
勅賜詩人明月湖得句會應緣竹鶴思歸寧復為蓴鱸
橫空好在修眉色頭白猶堪乞左符

次韻秦少章和錢蒙仲

碧畦黃隴稻如京
歲美人和易得情
鑑裏移舟天外思
地中鳴角古來聲
山圍故國城空在
潮打西陵意未平
二子有如雙白鷺
隔江相照雪衣明

次韻答劉景文左藏

我老詩壇仆鼓旗
借君佳句發良時
但空賀監杯中物
莫示孫郎帳下兒
夜燭催詩金燼落
秋芳壓帽露華滋
故應好語如爬癢
有味難名只自知

次韻劉景文周次元寒食同遊西湖

絮飛春減不成年老境同乘下瀨船藍尾忽驚新火後
遨頭要及浣花前山西老將詩無敵洛下書生語更妍
共向北山尋二士畫橈鼉鼓聒清眠

次韻林子中蒜山亭見寄

奇逸多聞老敬通何人慷慨解憐翁十年簿領催衰白
一笑江山發醉紅聞道賦詩臨北固未應舉扇向西風
叩頭莫喚無家客歸埽岷峨一畝宮

再和并答楊次公

毗盧海上妙高峰二老遙知說此翁聊復艤舟尋紫翠
不妨持節散陳紅高懷却有雲門興好句真傳雪竇風
唱我三人無譜曲馮夷亦合舞幽宮

次韻子由書王晉卿畫山水一首而晉卿和二
首

誤點故教同子敬雜篇真欲擬湯休
壠雲寄我山中信
雪月追君溪上舟會看飛仙虎頭篋
却來顛倒拾遺裘
王孫辦作元真子細雨斜風不濕鷗

此景眼前聊妄想
幾人林下是真休
我今心似一潭月
君已身如萬斛舟
看畫題詩雙鶴鬢
歸田送老一羊裘
明年兼與士龍去
萬頃滄波沒兩鷗

景貺履常屢有詩
督叔弼季默唱和
已許諾矣
復以此句挑之

君家文律冠西京
旋築詩壇按酒兵
袖手莫輕真將種
致師須得老門生
明朝鄭伯降誰受
昨夜條侯壁已驚
從此醉翁天下樂
還須一舉百觴傾

次韻蔣穎叔二首

錄一首

扈從景靈宮

道人幽夢曉初還，已覺笙簫下月壇。
風伯前驅清宿霧，祝融參乘破朝寒。
英姿連壁從多士，妙句鏘金和八鑾。
已向詞臣得頗牧，時穎叔新除熙河帥路人莫作老儒看。

次韻曾仲錫元日見寄

蕭索東風兩鬢華，年年幡勝剪宮花。
愁聞塞曲吹蘆管，喜見春盤得蓼芽。
吾國舊供雲澤米，君家新致雪坑茶。

燕南異事真堪記三寸黃柑擘永嘉

八月七月初入贛過惶恐灘

七千里外二毛人十八灘頭一葉身山憶喜歡勞遠夢

蜀道有錯喜歡鋪在大散關上地名惶恐泣孤臣長風送客添帆腹積

雨浮舟減石鱗便合與官充水手此生何止畧知津

舟行至清遠縣見顧秀才極談惠州風物之美

到處聚觀香案吏此邦宜著玉堂仙江雲漠漠桂花濕
梅雨脩脩荔子然聞道黃柑常抵鵲不容朱橘更論錢

恰從神武來弘景便向羅浮覓稚川

新釀桂酒

擣香篩辣入瓶盆盎盎春溪帶雨渾收拾小山藏社甕
招呼明月到芳樽酒材已遣門生致菜把仍叨地主恩
爛煮葵羹斟桂醕風流可惜在蠻村

正月二十六日偶與數客野步嘉祐僧舍東南
野人家雜花甚開扣門求觀主人林氏媪出應
白髮青裙少寡獨居三十年矣感歎之餘作詩

記之

縹蒂細枝出絳房綠陰青子送春忙
涓涓泣露紫含笑
焰焰燒空紅佛桑
落日孤煙知客恨
短籬破屋為誰香
主人白髮青裙袂
子美詩中黃四孃

贈王子直秀才

萬里雲山一破裘
杖端閒挂百錢遊
五車書已留兒讀
二頃田應為鶴謀
水底笙歌蛙兩部
山中奴婢橘千頭
幅巾我欲相隨去
海上何人識故侯

連雨漲江二首

越井岡頭雲出山，
牂牁江上水如天。
牀牀避漏幽人屋，
浦浦移家蜚子船。
龍卷魚蝦并雨落，
人隨雞犬上墻眠。
只應樓下平階水，
長記先生過嶺年。

急雨蕭蕭作晚涼，
卧聞榕葉響長廊。
微明燈火耿殘夢，
半濕簾幃浥舊香。
高浪隱牀吹甕盎，
暗風驚樹擺琳琅。
先生不出晴無用，
留向空階滴夜長。

白鶴峰新居欲成夜過西鄰翟秀才二首

林行婆家初閉戶翟夫子舍尚留關連娟缺月黃昏後
縹緲新居紫翠間繫悶豈無羅帶水割愁還有劒鉞山
中原北望無歸日鄰火村春自往還

甕間畢卓防偷酒壁後匡衡不點燈待鑿平江百尺井
要分清暑一壺冰佐卿恐是歸來鶴次律寧非過去僧
他日莫尋王粲宅夢中來往本何曾

上元夜過赴儋守召獨坐有感

使君置酒莫相違守舍何妨獨掩扉靜看月牕盤蜥蜴

卧聞風幔落，蜉蝣燈花結。盡吾猶夢香篆消，時汝欲歸搔首淒涼十年事。傳柑歸遺滿朝衣。

次韻杭人裴維甫

餘杭門外葉飛秋，尚記居人挽去舟。一別臨平山上塢，五年雲夢澤南州。淒涼楚些緣吾發，邂逅秦淮為子留。寄謝西湖舊風月，故應時許夢中遊。

次韻仲殊雪中遊西湖二首

錄一首

寶雲樓閣開千門，林靜初無一鳥喧。閉戶莫教風掃地，

卷簾疑有月臨軒水光潋灩猶浮碧山色空濛已斂昏
乞得湯休奇絕句始知鹽雪是陳言

雙石 并序

至揚州獲二石其一綠色岡巒迤邐有穴達於背
其一玉白可鑑漬以盆水置几案間忽憶在潁州
日夢人請住一官府榜曰仇池覺而誦杜子美詩
曰萬古仇池穴潛通小有天乃戲作小詩為僚友
一笑

夢時良是覺時非
汲井埋盆故自癡
但見玉峰橫太白
便從鳥道絕峨眉
看秋風與作煙霞
意曉日令涵草木
姿
一點空明是何處
老人真欲住仇池

行宿泗間見徐州張天驥次舊韻

二年三躡過淮舟
款段還逢馬少游
無事不妨長好飲
著書自要且窮愁
孤松早偃原非病
倦鳥雖還豈是休
更欲河邊幾來往
祇今霜雪已蒙頭

次韻劉燾撫勾蜜漬荔枝

時新滿座聞名字別久何人記色香葉似楊梅蒸霧雨
花如盧橘傲風霜每憐蓴菜下鹽豉肯與蒲萄壓酒漿
回首驚塵卷飛雪詩情真合與君嘗

十二月十七日夜坐達曉寄子由

燈燼不挑垂暗蕊爐灰重撥尚餘薰清風欲發鴉翻樹
缺月初升犬吠雲閉眼此心新活計隨身孤影舊知聞
雷州別乘應危坐跨海幽光與子分

六月二十日夜渡海

參橫斗轉欲三更苦雨終風也解晴雲散月明誰點綴
天容海色本澄清空餘魯叟乘桴意麤識軒轅奏樂聲
九死南荒吾不恨茲遊奇絕冠平生

留題顯聖寺

渺渺疎林集晚雅孤村煙火梵王家幽人自種千頭橘
遠客來尋百結花浮石已乾霜後水焦坑開試雨前茶
祇疑歸夢西南去翠竹江村遶白沙

惠州近城數小山類蜀道春與進士許毅野步

會意處飲之且醉作詩以記適參寥專使欲歸
使持此以示西湖之上諸友庶使知余未嘗一
日忘湖山也

夕陽飛絮亂平蕪萬里春前一酒壺鐵化雙魚沉遠素
劍分二嶺隔中區花曾識面香仍好鳥不知名聲自呼
夢想平生消未盡滿林煙月到西湖

過嶺二首

錄一首

七年來往我何堪又試曹溪一勺甘夢裏似曾遷海外

醉中不覺到江南波生濯足鳴空澗霧繞征衣滴翠嵐
誰遣山雞忽驚起半巖花雨落璚璚

永和清都觀道士童顏鬢髮問其年生於丙子
蓋與予同求此詩

鏡湖敕賜老江東未似西歸玉局翁
羈枕未容春夢斷清都宛在默存中
每逢佳境攜兒去試問行年與我同
自笑餘生消底物半篙清漲百灘空

秋興三首

野鳥游魚信往還此身同寄水雲間誰家晚吹殘紅葉
一夜歸心滿舊山可慰摧頽仍健食此生通脫屢酡顏
年華豈是催人老雙鬢無端只自斑

故里依然一夢前相攜重上釣魚船嘗陪大幙今陳迹
謬忝承明媿昔年報國無成空白首退耕何處有名田
黃雞白酒雲山約此計當時已浩然

浴鳳池邊星斗光宴餘香滿上書囊樓前夜月低韋曲
雲裏車聲出未央去國何年雙鬢雪黃花重見一枝霜

傷心無限厭厭夢長似秋宵一倍長


卧病逾月請郡不許復值玉堂十一月一日鎖
院是日苦寒詔賜官燭法酒書呈同院

微霰疎疎點玉堂詞頭夜下攬衣忙分光御燭星辰爛
拜賜宮壺雨露香醉眼有花書字大老人無睡漏聲長
何時却逐桑榆暖社酒寒燈樂未央

御選宋詩卷四十七

謹案第二十三頁前七行何人織得相思字刊本
織訛識據東坡集改





總校官庶吉士臣侍朝
校對官檢討臣蕭九成
謄錄舉人臣李駟